

**TALKING POINT**  
**DATO' PROF. DR. ZUL AZHAR ZAHID JAMAL**  
**NAIB CANSELOR**  
**UNIVERSITI MALAYSIA PERLIS**  
**SEMPENA PERJUMPAAN MINGGUAN BERSAMA PENGURUSAN TERTINGGI UNIVERSITI**  
**28 MAC 2018**  
**DI KOMPLEKS SUKAN UniMAP, PAUH PUTRA**

Assalamualaikum Warahmatullahi Wabarakatuh

Salam Negaraku Malaysia

Salam Ilmu, Keikhlasan, Kecemerlangan UniMAP

**SALUTASI**

**Yang Berbahagia Timbalan - timbalan Naib Canselor UniMAP**

**Yang Berusaha Pegawai -Pegawai Utama Universiti**

Dekan-dekan dan Ketua-ketua Jabatan,

Seterusnya warga Universiti Malaysia Perlis yang saya kasihi sekalian.

**KATA ALU-ALUAN**

1. Alhamdulillah, bersyukur kerana masih lagi diberi kesempatan oleh Allah Aza Wajalla untuk berkumpul di pagi yang berbahagia ini untuk mendengar amanat dan berkongsi maklumat terkini mengenai perjalanan universiti dalam Progam Perjumpaan Mingguan Bersama Pengurusan Tertinggi Universiti. Di samping mendengar perkongsian maklumat terkini berkaitan universiti, kita juga dapat menyihatkan badan melalui aktiviti senamrobik yang dijalankan.

2. Terima kasih diucapkan kepada semua warga UniMAP yang sanggup memberikan komitmen pada pagi yang indah ini. Berikan tepukan yang gemuruh buat diri saudara saudari.

## INFO KESIHATAN

### TIBI

3. Pada minggu ini saya ingin berkongsi Info Kesihatan mengenai Penyakit Tuberkulosis (Tibi) atau Batuk Kering. Ia adalah masalah dan isu kesihatan di peringkat global dan bukanlah di Malaysia sahaja. Pertubuhan Kesihatan Sedunia (WHO) menganggarkan 10.4 juta kes Tibi di seluruh dunia bagi tahun 2016 dan 1.3 juta kematian yang disebabkan oleh penyakit Tibi.
4. Dianggarkan satu pertiga (1/3) daripada populasi dunia menghidap latent Tibi, iaitu mereka yang telah dijangkiti kuman penyebab Tibi namun masih belum berkembang menjadi penyakit Tibi dan tidak boleh menyebarkan penyakit Tibi. Manakala 10% daripada kalangan mereka yang dijangkiti latent Tibi boleh berkembang menjadi penyakit Tibi dan menyebarkan penyakit ini.
5. Tujuh negara tertinggi yang menyumbang kepada 64% kes Tibi di peringkat global, didahului dengan India dan diikuti oleh **Indonesia, China, Filipina, Pakistan, Nigeria, dan Afrika Selatan.**
6. Di Malaysia, 26,168 kes Tibi telah dilaporkan pada tahun 2017, iaitu peningkatan sebanyak 8% berbanding 24,220 kes pada tahun 2015. Kadar kematian Tibi pada tahun 2015 adalah 5.5 setiap 100,000 penduduk dan telah meningkat kepada 6.8 setiap 100,000 penduduk pada tahun 2017.
7. Saya difahamkan di UniMAP juga tidak terkecuali bagi kes Tibi, di mana pada tahun 2011 hingga 2017 terdapat beberapa kes telah dilaporkan di kalangan pelajar.

8. Alhamdulillah, semua kes telah selesai rawatan dan telah disahkan bebas Tibi. Saringan kesihatan juga telah dijalankan oleh Pejabat Kesihatan Kangar dengan kerjasama Pusat Kesihatan UniMAP terhadap “cohort” pelajar berkenaan melibatkan rakan bilik, rakan sekelas dan tenaga pengajar.
9. Oleh itu, di kesempatan ini, saya ingin menyeru semua individu yang mempunyai tanda-tanda penyakit Tibi seperti batuk-batuk yang berpanjangan melebihi dua (2) minggu, demam, berpeluh pada waktu malam, kurang selera makan, susut berat badan dan batuk berdarah perlu membuat pemeriksaan di Pusat Kesihatan UniMAP, klinik-klinik kesihatan dan hospital berhampiran bagi melakukan ujian saringan bagi penyakit ini.
10. Selain itu, semua warga UniMAP dinasihatkan untuk mengamalkan gaya hidup sihat dengan mengambil makanan yang kaya dengan nutrisi untuk meningkatkan imunitas badan, memastikan pengudaraan yang baik di rumah dan tempat kerja.
11. Jika bersin atau batuk, kita hendaklah membasuh tangan serta memakai penutup mulut dan hidung dan paling penting memastikan bayi anda yang baru lahir menerima suntikan BCG.

Warga UniMAP yang saya kasihi

### **PROGRAM TELAH BERLANGSUNG**

### **MAJLIS PENYERAHAN SURAT PERSETUJUAN KEPADA UNIVERSITI MALAYSIA PERLIS UNTUK MEMBEKAL PERKHIDMATAN KAJIAN PASARAN ELECTRIC TWO- WHEELER**

12. Alhamdulillah, semalam telah berlangsung Majlis menandatangani dokumen perjanjian di antara Tessolve Semiconductor Sdn. Bhd. dengan pihak Pihak Berkuasa Pelaksanaan Koridor Utara (NCIA) serta penyerahan surat persetujuan kepada Universiti Malaysia Perlis untuk membekal perkhidmatan kajian pasaran Electric Two-wheeler bertempat di Kompleks Dewan Undangan Negeri Perlis.
13. Majlis penyerahan surat persetujuan kepada Universiti Malaysia Perlis disempurnakan Ketua Pegawai Eksekutif NCIA, Datuk Redza Rafiq Abdul Razak dan disaksikan YAB Menteri Besar Perlis, Datuk Seri Azlan Man.
14. Berikan tepukan yang gemuruh kepada mereka yang terlibat secara langsung mahupun tidak langsung dalam mengharumkan nama UniMAP. Tahniah dan syabas diucapkan.

Hadirin dan hadirat sekalian

### **PROGRAM BAKAL BERLANGSUNG**

#### **ANUGERAH SERI GEMILANG (ASG) 2017**

15. Pada 29 Mac ini akan berlangsung Majlis Anugerah Seri Gemilang 2017 bagi memberi penghargaan kepada jasa dan sumbangan warga UniMAP dalam perkhidmatan dan meningkatkan imej universiti sepanjang perkhidmatan mereka pada tahun 2017.
16. Untuk makluman, DYTM Canselor UniMAP, Tuanku Syed Faizuddin Putra Ibni Syed Sirajuddin Jamallullail dan DYTM Pro Canselor UniMAP, Tuanku Hajah Lailatul Shahreen Akashah Khalil turut berkenan bercemar duli berangkat hadir pada majlis tersebut. Marilah kita bersama-sama mendoakan agar majlis ini berjalan dengan lancar. InsyaAllah.

Hadirin dan hadirat sekalian

### **PENUTUP**

17. Saya rasa cukup sahaja sampai di sini ini. Semoga perkongsian pada hari ini memberikan manfaat kepada kita semua. Saya sudahi dengan Wabillahitaufik Walhidayah Wassalamualaikum Warahmatullahi Taala Wabarakatuh.